

24. august 1998

UKA 1998/23

Oqaaseqaatit nalinginnaasut

Naalackersuisut 1999-imi aningaasanut inatsisissamut siunnersuutaannut atatillugu siunnersuutigineqarpoq raajanut akitsuutip, ulloq 1. januar 1999 aallarnerfigalugu, 1 procent-imiit 3 procent-imut qaffanneqarnissaa. Ilutigitillugu ilanngaatip umiarsuarmut ataatsimut 4.000.000 koruuniusup atorunnaarsinneqarnissaa siunnersuutaavoq.

Siunnersuutip aningaasaqarniarnikkut siunertaraa kilisaatit raajanik tunisassiortut raajarniarsinnaanermittut atatillugu aningaasartuutinik akilersuisuunissaat pissusissamisoortut isigineqarmat, tassa aalisarnermik nakkutilliisoqarnerup aningaasalersornissaanut, kilisaatimmi atorlugit raajarniarneq pissutiginerullugu nakkutilliinermik aaqqissuussineq pilersinneqarnikummat-.

Raajanut akitsuutip qaffanneqarnerata il.il. kingunerisaannik ukiumi naatsorsuuteqarfiusumi 1999-imi aammalu ukiuni missingersuusiorfiusuni isertitassat 14 mio. koruuninik qaffannissaat naatsorsuutigineqarpoq, taamaalillutik raajanut akitsuutit ukiumut katillutik 20,5 mio. koruuniussallutik. Raajanut akitsuutip qaffanneqarneratigut inuttat akissarsiaannit akileraarutissat malunnanggingajattumik annikillissapput, kiisalu aamma selskabit akileraarutaannut malunniutissalluni, tassami selskabip aningaasarsiami akileraaruteqaataasussat naatsorsornerini raajanut akitsuut ilanngaatigisinnaammagu. Selskabilli killeqanngitsumik nalikilliliisinnaaneq aqqutigalugu akileraarutissaminnik annertuumik kinguartitsisarmata, ukiuni aggersuni selskabit akileraarutaasigut isertitassat annaasaqarfiunissaat naatsorsuutigineqanngilaq.

Akitsuummik qaffaaneq allaffissornermut sunniuteqartussaangilaq.

Aalajangersakkanut ataasiakkaanut oqaaseqaatit

§ 1, nr. 1-imut

Siunnersuutaavoq akitsuutip akitsuusigassat tunngaviisa 3 procent-iisut annertussuseqarnissaa.

§ 1, nr. 2-mut

Siunnersuutigineqarpoq kvartalimut akitsuutissat naatsorsorneqarneranni ilanngaatisap 1 mio. koruuniusup atorunnaarsinneqarnissaa, tamatumalu kingunerisaanik ilanngaatissanik atunngitsuukkanik ukiumi akitsuuteqarfiusumi kvartalimut tullermut nuussisinnaanerup aammattaaq atorunnaarsinneqarnissaa.

§ 2-mut

Siunnersuutigineqarpoq inatsisip ullormi 1. januar 1999-imi atortuulernissaa.